

DIZ IST VON DEN SECHS KRONEN.

- Hs. 61, 133^b Dje alden frommen hant vns geseyt, 10
 Daz tugent ist ein eren cleit,
 Zucht ein schoner mantel drobe,
 5 Schame ein gürtel, den ich lobe,
 Bescheydenheit ein schappel fyn;
 Mesekeit mag wol syn
 Ein gezielter fürsperge reyne,
 Verswigenheit ein edel steyne
 10 An finger in dem golde.
 Mit myme wunsche ich wolde,
 Daz ein iglich frommes wip
 Drüge alsoliche cleider ir stultzer lip,
 Wan wo man von frauwen rette.
 15 Nü wil ich hie in dirre stete
 Eyns glichniß sagen myne wort,
 Obe is vmmmer keyne frauwe gehortt,
 Das sie ein bilde neme hie abe,
 Des ich reden willen habe.
 20 Durch wilde gefirte in gebirge hoch
 Eynen fromden weg, den ich da zoch
 In die lant, dar ich willen hatte,
 Vff eynen fels ich an der stete
 Ein schon getwerch sach siczen,
 25 Ein Crone von goldes gliczen.
 Ein gommis gesattelt by yme stünt,
 Da mir daz getwerch wart eben künt.
 Hs. 61, 134 Ez saß vff vnd reit dar von.

1. Diese überschrift nehme ich aus der Idsteiner hs. Vgl. Herrigs archiv
 11, 453. 22. ? hete.

Vbir eynen fels begünde is sich lan,
 Der mir vil zü wilde waz.
 Eyns det ich, da ich abe saß,
 Eynen weg, den zoch ich vmme,
 5 Nicht lange, ein wenig krumme.
 Daz getwerch noch vor mir reyrt.
 Vndir eyne felße ein porte breyt
 Vnde dicke von ysen wol beslagen.
 Daz getwerch sach ich da hin yn iagen.
 10 Die phorten offin is da liez.
 Ich staffte hin zü rechte, kein verdrieß
 Hatte ich da vnd reyrt hin yn
 Vnd sach ein gemüritze schon vnd fyn,
 Daz stünt enbor gemarmelt.
 15 Gefehet vnd gehermelt
 Hing manig gedecke an finster sal.
 Eyne schone maget noch wünschis wal
 Die grede zü mir her aber ging.
 Mit rodem monde sie mich enphing
 20 Vnd sie wonderte, von wanne ich queme.
 Ich sprach: reyne frucht geneme,
 Ich sach eynen cleynen gecronten man.
 Wißent, daz ich dem selben han
 Geryddin nach mit fißis gir;
 Hs. 61, 134^b Der liez die porten offen mir.
 Also bin ich komen her.
 Da rieß die maget balde der
 Eyne cleynen, der mir myn phert hielt.
 Ir zücht, ir ere dügent wielt.
 30 Mit der hant sie furte mich vff.
 Mit züchten ging ich mit ir drüff
 Zü eyne sale, da ging sie yn.
 Mit gezierde ein werde konigin
 Enbor rechte vmb hangen waz
 35 Mit gülde vnd sydde, manig pheller waz
 Oben vnd neben behangen schon.
 Gein ir schiere ich mich da lan

- Vff eyn kny, da ich für sie quam.
 Sie enphing mich schon, als ir wol zam,
 Vnd fragte mich der lande mere,
 Von wannen ich üs geritten were.
 5 Ich sprach zu ir: von dutzschen landen.
 Da sweig die frauwe zü hande.
 Da stünt ich vff vnd ging hinder mich
 Hin vnd her; da lüte ich.
 Zu der konigynnen recht zü hant
 10 Sach ich ses cronen an eyner want
 Von güld, von gesteyne, die hingent da
 Köstlich gezieret zü hant also.
 Da sach ich zür lincken hant herwider.
 Hs. 61, 135 An eyner want nit gar nyder
 15 Sach ich ses Cronen kostlich rych
 Auch hangen, da waren yenen glich.
 Die gezierde ich da gerne sach.
 Zü hant die konigynne zü mir sprach:
 Gefellet dir myn gezierde wol?
 20 Ja, edele frauwe, ich sprechen sol,
 Diese hoffgezirde ich gerne sehen.
 Mit ganczer warheit ich daz iehen.
 Ir hant vil schöner mede hie,
 Vnd alsolich Ritter gesach ich nye,
 25 So süße vnd so cleyn,
 Als ir alhie gemeyne
 Vff üwerme hoffe diener hant,
 Die vch zü dinste mit truwen stant.
 Sie sprach: wiße, daz die diener myn,
 30 Wie cleyn sie sint, yn ist manheit schin.
 So ist den megden trüwe bekant.
 Fare vff also wyde durch die lant!
 Dü findest nicht alsolich hoffezucht.
 Mit uwer m orlaube, reyne frucht,
 35 Ich wil vil frage lan vnderwegen
 Vnd wil eyner alleyne plegen.
 Bescheydent mich, vil reyne art,

- Also liep vch ye keyn mensche wart,
 Hs. 61, 135^b Waz meynen die Rychen schone crone,
 Die an der wende hangent schone?
 Dügentlich sie zü mir sprach,
 5 Die hochgelobte mich ane sach
 Vnd sprach: bistü ein wandelber
 Vnd ferst von landen her vnd der?
 Daz wiße, edele konigin Rych,
 Daz gar selden rüwen ich.
 10 Ich bin hie vnd danne da,
 Min zit virdribin ich hie also.
 Nü mercke, sprach die konigin,
 Min worte ich dir zue rechte schin,
 Waz die cronen rych da hangen.
 15 Dich sal der rede nicht belangen.
 Nü wiße daz an argen list,
 Wo daz ein reynes wip nü ist,
 In alsolichem synne, alz ich dir sage,
 Waz sie zit, stunde vnd dage
 20 In steden truwen willig lebet
 Vnd nach vntrüwen nicht enstebet,
 Daz sie dem manne, der zue ir hort,
 Sin gemüte nicht enstort,
 Mit irer güte swendet leyt
 25 Vnd yme zue dinste ist stedes bereit
 In gehorsamkeit stediclichen trüwen
 Hs. 61, 136 Vnd stediclich kan freüde nüwen,
 Mit stedekeit lieben sich,
 Eyner alsolichen frauen senden ich
 30 Eyn crone von der rechten hant.
 Ir wirt myn lon zü leste bekant.
 Die irste crone gebe ich alsus.
 Nü dün ich dir die andern schin.
 Die gehöret einer alsolichen frauwen zü,
 35 Die da hat dügent spat vnd frü,
 Daz sie die ding gegüden kan
 Geyn yme gesinde vnd irme man,
 Geyn rich, gein arm, wer sie sint,

Daz me dügent an an ir fint
 Vnd helfferliche stüre,
 Demüdig vnd gehüre,
 Mit dugentlichin synnen,
 5 Des rechten sich herynnen,
 Das da ir dugent wyßlich stet
 Vnd alle vndogent faren let,
 Da schande schade mag komen von,
 Eyner alsolichen frauwen myner cronen ich gan
 10 Vnd emphahe sie in die hulde myn,
 Sie heyßet zü rechte myn dyeneryn.
 Die dritte Crons (ich sagen dir hie)
 Hs. 61, 136^b Eyn wip sal dragen, die da nye
 Mit vnzüchten gerne vmb geging,
 15 Daz zucht in ir nymmt reyn orsprong,
 Daz da ir wandel löbelich ist
 Vnd reyner gebirde ir nicht gebrist,
 Zemlich vnd gütlich an zu sehen,
 Früntholt erber sie zü spehen
 20 Mit senffter rede, mit lachindem müde
 Gein yederman zücht dün künt
 Vnd alle schalkeit erberlich
 Vnd alle ir werk in züchten rych
 Mit löbelichem wandel.
 25 Ertig als ein mandel
 Ist alsolich eyn frauwe reyn.
 Der schicke ich myner cronen eyn
 Vnd hat myn hülde stede da myde.
 Fürbaz me ich dich bide,
 30 Höre furbaz, war die vierde crone künt!
 Wo ein wiplich wip ist alle stünt
 In schame vnd in bescheydenheit
 Vnd nicht virlastlich sich dreyt
 Vnd eyner erbern schame waldet
 35 Vnd wißlich sich dan heldet
 In godes fochte nacht vnd dag,
 Daz allez, daz sie sehen mag,

1. ? Daz man me tugent an ir. 12. ? crone. 20. ? munt.

- Ir lop vnd rüm vnd ere gyt,
 Hs. 61, 137 Wo frolicheit an schone leyt
 In alsolichem reynem wybe
 Vnd in kürzwile doch blibe,
 5 Da sie is mit eren haben sol,
 Die virdienet myne crone wol,
 Wan ich geben sie ir in wirdekeit.
 Von der funfften dir wirt geseit,
 Die gehoret eyner werden frauen clug,
 10 Die sich zühet in alsolichen gefug
 Mit meßekeit vnd in gnucht
 Vnd gebrüchet zemlich der spyse frucht
 Vnd alle ir dün ist süßer reyne,
 Mit küsheit wandelz eyne,
 15 Mit cleider vnd mit worte,
 Daz man nit sehe noch horte
 An ir keyn vngenücztes drüg,
 Noch nummer keynen bosen düg
 20 Mag ir mit warheit zu gesprechen
 Noch vnwarheit uff sie gedrechen.
 Was sie düt, daz stet wol ir
 Vnd ist züm besten stede ir gir
 Vnd dreit gute bilde den luten vor.
 Min crone (ich sage dir vor war)
 25 Von rechte sal han eyn alsoliche frauwe,
 In myme dinste sich laßen schauwen,
 Vnd ist daz selbe mügelich.
 Die sehste crone dy han ich
 Hs. 61, 137^b Behalden eyne wibe warhafft,
 30 Die hercze, synne, müt vnd crafft
 Vff alle wiplichkeit kan gestellen
 Vnd zue allen eren sich gesellen,
 Nit cleffig mit irme monde,
 Warhafftig zue aller stunde,
 35 Noch hindir klaffin nach keynen spot
 Vs irme munde nicht engat,
 Mit wiczen wise vnd ernstlich
 Zue nütze, zue eren halden sich,

Den iren vnrecht nicht enstaden,
 Wißlich durch sorgen, nützlich durch waten,
 Leren vnd straffen vnd rechten syn
 Vnd wol an legen iren gewin,
 5 Gebin vnd nemen, daz erlich ist.
 Nü han ich an dirre frist
 Zür rechten hant die cronen myn
 Dir vz geleyt in warheit schin.
 Genade, frauwe, der sin ist güet,
 10 Wan üwer hercze hat frummen müt
 Vnd ist vch trüwe vnd ere vntruwe künt.
 Vmme die cronen zür lincken hant,
 Wer die verdienet, durch üwer zücht
 Daz sagent mir, vil reyne frucht!
 15 Ir munt lachte vnd sprach:
 Du saltz von mir sagen noch.
 Hs. 61, 138 Ich wil dichs recht bescheyden.
 Daz dir myn rede nicht leyden!
 Wo eyns frommen mannes nam
 20 Hat synne vnd lyp in solicher klam,
 Daz er ist wiplichen früchten holt
 Vnd gerne verdiente ir lones solt,
 Der sal trüwe mit truwen gelden
 Vnd zwifel sich nicht laßen schelden
 25 Nach argwan ere nit wenden,
 Drüwe in fürsacz enden,
 Da er wirt drüwen ynne,
 Da sal die ware mynne
 30 Enzünden in lieplichkeyt,
 In dinstlicher stedekeit
 Mit truwen trüwelich harren
 Vnd die liebe besparren
 In sin hercze, die yn da meynet,
 Als ich mit rede habe vor herscheynt,
 35 So wirt yme myner wirde crone
 Vnd nynt von mir die süßen lon.
 Siech, daz ist der cronen eyn

Gegeben hin in ganczer meyn.
 Wer die andern haben sol,
 Hs. 61, 138^b Der luge vnd sy besynnet wol,
 Daz er sin zucht nicht ybir gebe,
 5 Das er ymmer dar nach strebe,
 Das yme geyn frauwen vbel stet
 Vnd er kein vnzücht iemer let
 In herczen vnd in synnen.
 Mit züchten er gewynnen
 10 Sal der hulde, dye zucht auch pliget.
 Eyn züchtig man gein zucht gefieget,
 So er der werden wibe schonet.
 Obe dem die mynne mit züchten lonet,
 Mit lieplichir zemelichkeyt,
 15 Fro sy daz hercze vnd gemeyt,
 Daz in virswigen reyner zucht
 Erlich heldet ein wiplich frucht.
 Wer also myn crone erwirbet,
 An dem kein selde verdirbet,
 20 Ime wirt myn krone vnd hulde,
 Das er keyne schande dulde.
 Wer gülich ist vnd dugenthafft
 Vnd dreit mit eren der tügende crafft,
 Der sal die dritte crone han,
 25 Ob er yme selber dügent gan
 Mit worte, mit werke, mit güten
 Vnd frauwen eren behüten.
 Wie er daz mit tügenden zü brenget,
 Hs. 61, 139 Ob kein lügener erclinget
 30 Von reynem dugenthafften wibe,
 Das sal eins mannes dügent verdribe
 Gülich vnd züm besten,
 Der frauwen ere zü vesten.
 Alsus sal dügent nach duginden streben,
 35 In mildekeit gein frauwen leben
 Vnd yn virgebin nach dugent sitten.
 Der also düt, dem ist gesnytten
 Mine cleyder vnd myn crone fyn.

In myme dinste so sal er sin.
 Min vierde crone wol gestalt
 Ist eyne manne zü gezalt,
 Der da schemig vnd erber ist,
 5 Gein fraüwen hat keynen argen list
 Vnd sich scheme zü betriegen,
 Nach zü keymē schaden biegen,
 Nach vngestüde by yn haben
 Vnd nicht felschlich nemen gaben,
 10 Schentlich nummer von yn reden,
 Mit monde, mit herczen, den bieten,
 Ruemen reyner wibe ere,
 Schemelich nicht gen vür frauwen here,
 Mit frunkeit hant by yne schame
 Hs. 61, 139^b Vnd achten dirre wibes nam
 Vnd in mit dinste vndertan,
 So mag yn wol werden myn kron.
 Wer also heldet synne vnd müt,
 Den habe ich stede in myner hüt.
 20 Die funffte crone zvr lincten hant
 Wirt eyne frommen man gesant,
 Der alle fraüwen gerne eret
 Vnd misset ir wirde vnd keret
 Sie dan in reynikeit,
 25 Vor yn messig sin rede seyt
 Vnd nit clapperen hat her vnd dar
 Vnd alle vngüncht der vor jn spar,
 Was vbel stat zü sehen,
 Keyn vngestum mit Worten iehen,
 30 Vnzemlich mit rüren laßen
 In vngünstiger maßen,
 Kein schande frauwen dragen zü.
 Wiße recht, der also düwe,
 Dem zele ich zü die crone myn
 35 Vnd sal in myme dinste syn.
 Die seste crone ich wil geben,
 Welch man in frumkeyd leben,
 Was er den zarten frauwen red,

Daz warhafft sint der worte stet
 Vnd man kein lag noch vnderbrüche
 Noch falsche rede icht da süche,
 Hs. 61, 140 Vnd wo er vngeberde sehe,
 5 Der da were frummen wyben smehe,
 Vnd er daz wißlich vnderstünde,
 Mit hoffelichkeit fünde soliche fünde,
 Daz zemelich straffin vnd wise lere
 Den wiben dede, da mide ir ere
 10 Möchte vnuersmacht bliben.
 Wer also det, den wil ich schryben
 Zü myner cronen vff sin heübt;
 Aller schanden er ist beraübet
 Vnd gelücke sin ewig wald.
 15 Also habe ich dir erzalt,
 Wie man myne crone verdienen mag.
 Syt, werde fraüwe, an vch ie lag
 Vernüfft vnd dar zü ere,
 Ich bieden vch, konigin here,
 20 Sagent mir, fraüwe wol gedan,
 Müßent ir des iars icht vil cronen han?
 Wiße vür war, ich wil dir iehen,
 Das ichs gar anders han gesehen,
 Wan is in der wernde nü stet.
 25 Mine cronen man nü rasten let.
 Hie für trüwe vnd ere der wernde waz wert,
 Vnzücht vnd schande man nü gert.
 Die wernt so gar verseczet ist
 Hs. 61, 140^b Vff schalkeyt vnd vff falschen list.
 30 Ich sprach: frauwe, ir hant war.
 Frauen vnd man mit falschem var,
 Vnd ist so vil der luderihe.
 Mit orlaup, fraüwe, konigynne fry,
 Sagent üwern namen mir!
 35 Sie sprach: gerne ich sagen dir.
 Ich heißen die alte ere.
 Die nüwe die hat ander lere;
 Die siczet in dem finstern dal

- Vnd let ir hoffzucht werden smal.
 Mit dem ich gerte von dannen,
 Zü der konigin vnd iren mannen
 Vnd von den meden ich orlaup nam
 5 Vnd reynt ich schier, da quam
 Ich vff eynen schonen widen plan,
 Berg vnd burg mir waz vor gan,
 Vnd reynt, dar ich willen hatte.
 Ich danckte gode an der stete
 10 Vnd lobete die edele maget wert,
 Der got zü müter hatte begert,
 Die bat ich mich beschirmen wol.
 Fraüwen vnd man dis merken sol
 In dirre glichniße myner wort,
 15 Wan trüwe vnd ere ist lobes hart.
 Zücht vnd scham stet fraüwen wol.
 Hs. 61, 141 Tügent man rümen sol.
 Virswigen, milde vnd warhafft
 Hat großir selten doginde crafft.
 20 Jüngfraüwen vnd fraüwen, dis gedencken!
 Dem rechten nummer nicht entwencken!
 Habent got für aügen vnd lobent yn!
 Hie mide min rede sal ende sin.